

Tata di mucha muher victima di abuso sexual kier pa autoridad actua rapido

By **Redaccion 36** - May 28, 2019



- Advertisement -

Mayor a bay warda pa haci denuncia

****Tata conoce sospechoso for di basta tempo***

****IT Manager lo a bay Guyana***

ORANJESTAD (AAN): Siman pasa, comunidad di Aruba a haya sa di un otro caso lamentable unda un mucha muher di 15 aña bayendo un scol secundario a wordo abusa sexualmente.

E caso a bira di conocimiento publico ariba social media y den prensa. Akinan a apunta dede ariba un IT manager na e scol en cuestion cu despues a wordo kita for di trabao y awor parce a sali for di Aruba pa bay Guyana.

Den e caso aki tin entendi cu e mama di e mucha muher no tabata kier a entrega keho na autoridad pa asina e caso por cana su caminda.

A logra haya e reaccion di e tata Krishna Harilall kende ta bisa cu el a bay haci denuncia na polis. El a indica cu Polis no kier a tuma su declaracion pasobra cu ta e mama mester haci e denuncia.

Banda di esaki el a duna di conoce cu e cu e director di e scol tabata bon amigo di dje y nunca el a inform'e cu algo a pasa na scol cu su yiu.

E kier sa kico a pasa y awor ta resulta cu ta e mama so tin e derecho pa haya sa tur cos y ta cuestiona dicon nunca e director a bis'e nada.

Su yiu muher di 15 aña a wordo abusa, a expresa. E ta para pa e derecho di e mucha, aunke e mama no kier haci nada al respecto.

E meneer a duna di conoce cu el a traha cu e scol tambe pero no sa pakico nunca a pone na altura di locual a pasa cu su yiu.

Awor el a presenta na warda di polis pa haci denuncia pero polis a bise cu ta e mama tin afspraak y cu e no por haci nada. "Mama so tin derecho? Tata no tin derecho. Wel asina e cos ta bay?. Muchanan ta haya abuso, ora e mama y tata ta separa, e tata no por haci nada?", a expresa.

E tata hopi indigna a agrega cu e caso a sosode dos luna pasa y polis mes a bise cu ningun hende kier a haci denuncia. Awor dos siman pasa su ex casa kier pone tur cos ariba social media, a bisa.

Harilall a declara cu e mes no tabata na Aruba y e ta mira esaki como un caso perdi. E no ta di acuerdo con e scol a handle cu e situacion den su ausencia. A duna di conoce cu e ta voogd 50/50 cu e mama, cu e tin recibonan pa muestra cu e yuda e mama.

E ta kere cu Voogdijraad mester interveni y pone e mucha muher den un lugar safe.

MAYORNAN A TRAHA NA SCOL TAMBE

E mama, a laga sa, tambe ta traha na scol. E ta traha cu mucha y e tin otro yiu muher cu ta juffrouw di scol tambe. "E no ta sinta haci un cos asina. Cualquier cos ta pasa cu otro hende ora bo ta un juffrouw di scol, bo ta un mama ta limpia e scol, bo ta deal cu tur, bo ta deal cu mucha. Kico e ley ta haci?"

IT MANAGER TABATA UN CONOCI

Harilall kier pa autoridad actua rapido. El a indica cu e conoce e IT Manager di basta tempo. Algo asina nunca a yega di pasa cu su yiu y nunca el a spera cu algo asina por a pasa.

Banda di esaki a bisa cu ayera el a purba di tin contacto cu Jeugd en Zeden Politie y nan no a atende pasobra cu e mama so nan tin afspraak.

E ta reclama cu e no ta hayando derecho. E no lo stop y e lo acerca Voogdijraad tambe pa atende cu e derecho di su yiu. "Mi lo sigui te ora mi haya un contesta bon".

Finalmente e mayor a expresa cu ley mester actua contra e scol awor. E ta kere cu un amigo manera e director di scol no ta un amigo mas. E lo por haci mescos cu otro muchanan na scol, a remarca.

Segun e meneer, ora tur cos a bira publico e tabata den exterior pa dos siman. E ta lamenta cu no tin ningun denuncia cu a wordo haci den su ausencia ni di polis, ni di trahador social, ni di docter.

Awor e mama, a bisa, ta core haci denuncia pero e homber (IT) no ta na Aruba mas. E ta laat caba y e no sa si polis ta bay aresta e homber te na Guyana, pero esaki ta algo cu no por sigui mas, a remarca.

"Ainda mi ta un piedra den lama. Mi no sa ki banda mi ta bay ainda. Asina mi ta awor. (...) Mi no sa kico ta pasando na Aruba, pero mi kier accion awor", Harilall a expresa.

UPDATE

Prome cu ciere di edicion, Vocero di Cuerpo di Polis, Lito Lacle, a duna di conoce pa medio di un comunicado di prensa, cu na ningun momento a nenga di tuma denuncia.

“Coleganan di Jeugd en Zeden Politie conhuntamente cu Ministerio Publico a palabra cu e victima y su mama cu awe nan lo tuma nan declaracion/denuncia y ta locual coleganan di Jeugd en Zeden Politie a haci tambe”, esey ta loke e comunicado ta indica.

- Advertisement -

Redaccion 36
